

حزن الفرح ..

ياكبر ذنب السؤال ويثقل دم الاجابه
لا انتهى حبك وصدرك مختنق بحروف ليه
وقتها كن خافك جالي وحزنك شيخ لابه
اتصدد لكن الدنيا تحداك تنتخيه
يارفيق الهم علمني اذا عيني ربابه
منهو يسمع نرفها لامن نظرها ويحكيه
بسئلك بالله قلبي عن شقا الدرب وسرابه
كيف علقني بكذبه باكر اوصل وارثويه
لوفقلب الليل رحمه مافتح للجفن بابيه
وعشمه في حب نجمه يدري انها ماتبيه
ولو يضيق الكون بالطعنات تلقى بي رحابه
لاتعكر بال خنجر تركض ضلوعي تجيه
لايشيل الهم همه دام تجمععه القرابه
في صدر شاعر يعدده واحد منه وفيه
له علي دامه يبييني ماخونه في غيابيه
كان ماجالي اجي له يحتويني واحتويه
ولي عليه انه ماينساني ويصطفى عذابه
ولا يعرضني لضحك صدق ماعاد اشتيه
اقسى من حزني وهمي الفرح حضرة جنابه
لاطري مايطري الا منهو عرفني عليه
ذاك من يحكي على عيني وتقنع باغترابه
لجل تعتق صورة فيني سجت كل الوجيه
غايتي فرح الحزن لاينكسر بالقلب نابيه
وخوفي لا حزن الفرح يخنق لي انفاسه بيديه
من وري قلبي رسمتك غيم يحكي بوح غابه
كل غصن منحني فيها يمدله راحتيه
هناك صدري شوف بعيونك متاهات الغلابه
في شوارع هالجنابا كم متشرد نزيه
لاقبل عطف السنين ولارضى بسلم الذبابه
ماسئل كود الاماني يالاماني جاوبيه
ويش اقول وويش اخلي والابلوي ماتشابه
غير لا قالت في قلبي لاحشى مالي شبيه
ليت في وجه الزمن ذرة حيا واحسب احسابه
احشمه لجل يحشمني دون شي احتريه
وليت شعري ماخييب هقوة الي قد هقابه
لاتولج هاليمين وصحت فيها اكتبيه
وليت دربي لا نثنت رجلي يقدرني ترابه
كان وربي ما احاتي قولت ازري ينتيه
بعده يذبل اسمي بأخر دموع الكتابه
دام كل بيت بقصيدي شال دمعه مايليه
هذا انا يا صاحبي حلمي الاقي لي اجابه
لا انفجر صدري وضافت دنيتي بحروف ليه

محمد جار الله السهلي